



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 8

Yangia anidakangma :

f Tir Yimiyim

Instagram tiryimiyim@aolima

YouTube tir yimiyim

TAPAK 10

Zambia taoba tir Kenneth Kaunda den tepila sentong agiogo

Tokyo Olympics atema Maana Patel qualify süogo



VOL. XVIII NO. 259 (ADOK 259) DIMAPUR

KÜPTOKNÜ (SATURDAY)

CHITENI (JULY) 03, 2021

₹ 5.00

Nagaland nung COVID-19 Delta Variant 93 putet

Kohima, July 2, 2021 (TYO): Nagaland nung COVID-19 indang Delta variant 93 tashi putetogo ta Hokolbarnü Health and Family Welfare (HFW) Department-i metetdaksü. Delta variant dang B.1.617.2 ta-a ajar.

"NIGB, Kalyani, West Bengal dangi Whole Genome Sequencing atema yokba sample indang osangtem HFW Department-i nguogo" ta Principal Director, Dr Neikhrielle Khimiao-i ashi.

"Sample 98 tashi tendangtüsü bener yokba nungi sample 93 Delta variant, 2 Kappa variant (B.1.617.1) aser 1 Alpha variant (B.1.1.7) putetba osang nguogo. Ano, sample ana indang osang ano mangu lir" ta pai ashi.

"COVID-19 indang Delta variant ya kanga melamela menateper anungji nisung ajaki maneni COVID inyakyim beshitsü aser vaccine agitsü ayongzüker" ta Principal Director, Dr Neikhrielle-i ashi.

Sarma aser Rio na arrtsü onüktem jembi

Guwahati, July 2, 2021 (Agencies): Hokolbarnü New Delhi nung Assam Chief Minister Himanta Biswa Sarma-i Nagaland Chief Minister Neiphiu Rio den ajurutepe. Iba mapang tenati arrtsü dak sendakba onüktem lemsatep, ta Assam Chief Minister Sarma-i tanü nikongdang metetdaksü.

"Tanü New Delhi nung Nagaland CM Neiphiu Rio den ajurutepe. Künati sorkar anaprong külemi yaritepa arrtsü dak sendakba onüktem angatetteptsü atema tebilembatem lemsatep" ta CM Sarma-isa ashi.

Taoba mapang Assam CM Himanta Biswa Sarma-i osangbener den jembidang Assam sorkari Northeast state tem den arrtsü mangatettep onüktem angatetteptsü ta shia liasü.

"Northeast state tem tsüingda arrtsü mangatettep onüktem ajanga tetsükdaksü bentsür arur. Northeast state tem tsüingda arrtsü onüktem angatetteptsü atema Assam sorkari tongti süa inyaktüsü" ta Sarma-isa ashi.

"Asenok den kidanger state tem

den arrtsü onüktem angatettepba ajanga tourism, infrastructure development aser connectivity amala policy tem nung tajangzükalitsü aser Northeast renloktüsü" ta Sarma-isa ashi.

Brihostibarnü United Naga Tribes Association on Border Areas (UNTABA)-i Nagaland sorkar dang Assam den chief minister jenjang nung olemtepe alitsü aser interim agreement ajak meyipa reprangshitsü ayongzüko.

"Assam sorkari Nagaland lushii tashiyim agi aiter aser armed police o forest personnel atema camp tem amenoker. Tang Tsurangkong tzükong kübok Vikuto yim nung tensa ajurua aliba ya Assam sorkari asaa ali atsünga agitsü merangba lir. Parnoki mangatettep aliba tesemtem nung ozüing alema aruba nisungtem lidaktsütsü meranger" ta UNTABA-i ashi.

"Iba ya Assam sorkari tesüiba mapang nungi inyakba aruba mapa ka dang lir. Parnoki arrtsüilen Naga nung ali atsünga agir" ta UNTABA-isa ashi.



Nagaland nung IPR, SCERT & VG Advisor, asür Toshi Wungtung indang mang tanü Dimapur tonga bener arudang agiba noksa angur. Tanü Dimapur Airport nung Cabinet Minister, Advisor aser MLA tem den ENPO züngsemtem, NGOs, Dimapur DC o CP Dimapur, kinungertem aser medemertemi asür Toshi mang agizük. (Dimapur, July 2)

COVID-19 Nagaland: Nisung 25,382 nungi 22,897 taneptsü nguogo

Kohima, July 2, 2021 (TYO): Nagaland nung Hokolbarnü COVID-19 agi shiranger nisung 116 tashi taneptsü angu aser 77 dak putet.

"Tanü nisung 77 dak COVID-19 putet. Parnokji Dimapur nung 32, Kohima nung 16, Mokokchung nung 15, Wokha nung 4, Phek o Tuensang nung asemsem (3) aser Mon o

Zunheboto nung anana (2) lir. Parnok züngsema nisung ajak agi 25,382 kümogo" ta Integrated Disease Surveillance Project atema State Nodal Officer, Dr Nyanthung Kikon-i ashi.

Maneni tanü nisung 116 taneptsü angu. Parnokji Dimapur o Mokokchung nung metsür tiii (28), Kohima nung 16, Tuensang nung 15, Zunheboto

nung 14, Longleng nung 7, Mon nung 4, Phek nung 3 aser Peren nung 1 lir. Parnok züngsema taneptsü angur 22,897 kümogo" ta paisa metetdaksü.

Tanü taneptsü angurtem züngsema Nagaland nung taneptsü angur 90.20% kümogo aser tang nisung 1,280 anepaludar, ta Dr Kikon-isa ashi. (Maneni tapak 10 nung...)

DoSE-i sorkar school tem nem tetuyuba agütsür

Dimapur, July 2, 2021 (TYO): Nagaland sorkari government school nung tekolakpur ajak pei pei mapa lemsükdak alitsü aser anogoshia school-i aotsü tetuyuba agütsüogo.

"Anogo ka nung teaching aser non-teaching staff 50% school-i aotsü atema inyakyim ka renemtsüla" ta Principal

Director, Directorate of School Education, Shanavas C, IAS-i sangdong ka nung ashi.

"Teaching aser non-teaching staff ajaki COVID-19 inyakyim beshitsüla aser kidang nungi mapa inyakba staff tesadang kaji rongdak nungdak atema phone/mail ajanga tongteptsü" ta paisa ashi.

July 6, 2021 tashi nung school tem nung tesayurtem mapa lemsüka aliba osang July 7 nü DEO/ Sr. SDEO/SDEO nem agütsütsüla aser parnoki July 9, 2021 tashi nung Directorate dangi email-director.se.nagaland@gmail.com ajanga iba osang yoktsüla, ta Shanavas C-isa ashi. (Maneni tapak 10 nung...)

NMA-i Nagaland sorkar dang AFSPA agientsü mepishir

Dimapur, July 2, 2021 (TYO): Naga Mothers' Association (NMA)-i state sorkar dang Armed Forces Special Powers Act (AFSPA) agientsü atema mepishio.

"Nagaland nung AFSPA maneni benokba atema tebilemetsü abener aser Naga

nunger tarutsü atema yimjung aginüra iba Act agientsüla. State sorkari iba tashiyim ozüing odang benokdaksüba atema khuret abener" ta NMA-i Chief Minister Neiphiu Rio dangi shidi zülüogo.

"Tang Nagaland nung Naga yimten teloktem tsüingda rara

mali aser nisungtemi Naga accord sign asütsü atema yongya ataba mapang ka nung iba Act atsülangtsü nungdak madoker" ta NMA president Abei-Ü Meru aser joint secretary Malsawmthangi Leyri nati shidi nung ashi. (Maneni tapak 10 nung...)

Centre-i Tripura, Arunachal aser Manipur-i special medical teams yoktsü

New Delhi, July 2, 2021 (Agencies): Centre-i Tripura, Arunachal Pradesh aser Manipur state temi special medical teams yoktsü.

Northeast kübok state asem nung COVID-19 positive kanga puteter aser special medical teloktemi iba khuret atema kulitem bushitsü.

"Centre nungi medical team ka Tripura-i arutsü aser wara anema raraba nung yariteptsü" ta Tripura COVID-19 nodal officer, Dr Deep Debbarma-i ashi.

Tripura, Arunachal Pradesh aser Manipur dak alia Centre-isa Kerala, Odisha aser Chhattisgarh state temia central medical teams yoktsü. Centre-i 'Whole of

Government' aser 'Whole of Society' tangatetba nung wara anema rarayonga arur, ta Union Ministry of Health and Family Welfare-i sangdong ka nung ashi.

"State/UT sorkartemi COVID-19 anema inyakba maparen nung yariteptsü atema Centre-i mapang shia Central teams yoker" ta parnokisa ashi.

Office of the
Longkong Senso Mungdang
Mokokchung : Nagaland
TENÜNGSANG AGÜTSÜR
Mr. Nokchusüngküm S/o Late Sentiyangba Jamir aser Late Tongtanglemla Longkumer, pai Senior SDEO (Sub District Education Officer) jenjang tongteta Longkong Senso sanger nem konang nüngsang bener arutsü nung pa nem tepela tetushi agütsür.
Tarutsü anogotem aser mapang ajak nung pa aser par kibong asen Tsüngremi moajangma.
Sd/-
I.Imti Longkumer, Tir
Longkong Senso Mungdang

DIMAPUR AO BAPTIST AROGO PRAYER & HEALING MINISTRY
AJANGA TSÜNGREM NUNGI COVID WARA MADAK TANEPTSÜ
MESHIA SARASADEMTSÜ AMANGBAPUR AJAK AYONGZÜKER :
2nd-4th July 2021, Aonung asem (three nights) 8:00 PM shitak nung II Putipuyang 6:28-30 tashi ner kidang züngang aser temulunger ajaki kimai alua teka mekanga Tsüngrem dang wara agienjang ta sarasademdi. Ashiko Kibubai asenok dang taochitsü sayutsü ta amanger.
Sd/-
Kibubar Mapa nung,
Rev. Kika Jamir, DABA

Covid putetaka meshirangertem pei kidang takdang balaka nung mongdaksür, idangji -

Pei alidak aser ayipdak mopong aittsüsa kichiba (window & ventilation) lapoka yuang.
Akok tashi süngjanglijang aser süngolemba agi tua chiyongtsü tajung chiang aser tzu aser juice jemang.
Pei meyong mobile phone, kumesü aser toothbrush nunger ama melentepa tamshi.
Mozü achitsü agüja lira, aji shitak chiang.
Tango junga mesashiteta, teku ashiba, aketba aser temang metaba timtem lira yakta doctor bushiang.



MLA & Advisor Toshi Wungtung asukhu maneni lemsar

Dimapur, Chiteni/July 02 Yamakam Yimchunger'er jabaso (TYO): Principal Secretary, Home ajanga sangdong ka nung, Asür Toshi Wungtung atema State Funeral ya Honibarnü (03/07/2021) Purana Bazar, Dimapur nung par kidang anepdang 8:00 ako nungi agitsü aser iba sentong ya MyGovNagaland Channel nung Live Stream asütsü, ta nenshia metetdaksü.

Tejangrarteri iba sentong ya YouTube aser Facebook nung MyGovNagaland page mesüra https://youtube.com/channel/UCYpIWIak_KPBdqVToVHmB6g/ live nungi repringtetsü, ta ashi.

Asür Toshi Wungtung Advisor, I&PR, SCERT and Village Guards temang anepalua New Delhi nung amungdang July 1, 2021 nü asüba asoshi aoksar aser jashir, ta Nagaland Chief Secretary, J. Alam IAS ajanga sangdong ka nung ashi.

Shamator jila nung K. tejangraba liasü, ta Chief

Secretary ajanga ashi.

Tia maka pa anojungi asenok yutsür ogo, aser pa asüba ya Nagaland asoshi tashi tait aser temeim agi sünga aliba nübu tajung ka samar. Ajidang masü, ni atema tembar tajung ka samaogo, ta Chief Secretary-i ashi.

Pai nüburtem asoshi tasü ita mapa tajung inyakba atema teti bilemtetsü. Pa anojungi asüba ajanga tawa adokdaksüba asüngtsü kanga tasak asütsü, ta pai ashi.

Working Committee, Naga National Political Groups ajanga sangdong ka nung, adianu aser lenir Toshi Wungtung asüba osang angashia aoksar, ta metetdaksü.

Pa ya Yimchunger mesüra ENPO atema kisüng lenir masü saka Nagaland atema tejangja jabaso ka lir.

(Maneni tapak 10 nung...)



BUREAU OF ENERGY EFFICIENCY

(A Statutory body under Ministry of Power, Government of India)
4th Floor, Sewa Bhawan, R. K. Puram, New Delhi – 110066
Website: www.beeindia.gov.in, Ph: 011-26766700

AJAKI METETTSÜ ATEMA: 13 NOTIFIED SECTORS NUNG ENERGY AMSHIRTEM

Energy Conservation Act 2001 (52 of 2001) kübok Status of Energy Consumption indang Report agütsütsü atema

Tsünglanglen agüja aliba energy intensive sector nung specified limit dak alia energy intensive Annual Energy Consumption aliba energy amshir/class ajak designated consumers vide S.O. 394 (E) dated the 12th March, 2007, S.O. 3542 (E) dated 29th Dec. 2015, S.O. 1388(E) dated 02nd May, 2017 aser 502147 (E) Dated 17th June, 2020, under clause (e) of section 14 of the Energy Conservation Act (52 of 2001) indang metetdaksür.

S. No.	Notified Sector	Threshold Energy Consumption in metric tonne of oil equivalent (mtoe) per year
1.	Aluminium	7,500
2.	Cement	
	(a) Integrated Cement Unit	30,000
	(b) Cement Grinding Unit	10,000
3.	Commercial Buildings or Establishments	
	(a) Hotels	500
	(b) Airports	500
4.	Chlor-Alkali	12,000
5.	Electricity Distribution Companies (DISCOMs)*	*
6.	Fertilizer	30,000
7.	Iron & Steel	20,000
8.	Pulp & Paper	20,000
9.	Petroleum Refineries	90,000
10.	Petrochemical units having gas crackers or naphtha crackers or both	1,00,000
11.	Railways	
	(a) All Zonal Railways (Traction)	70,000
	(b) Workshops	750
	(c) 8 Production Factories of Railways namely, ICF, RCF, CLW, DLW, DCW, RWF, MCF & RWP	-
12.	Textile	3,000
13.	Thermal Power Stations	30,000

* * State/Joint Electricity regulatory commission ajanga electricity Act, 2003 (36 of 2003) kübok distribution licence agütsüba entities ajanga Designated Consumers (DCs) vide S.O. 3445(E) dated 28.09.2020 asütsü metetdaksü.

Central Government ajanga S.O. 687 (E) dated the 30th March, 2012, S.O. 1264 (E) dated 31st March, 2016 and S.O. 998(E) dated 30th March, 2017, S.O. 1409(E) dated 28th March, 2018, S.O. 1473(E) dated 29th March, 2019, S.O. 1254(E) dated 13th April, 2020 nung metetdaksüba ama pei sector nung agüja aliba energy consumption dang tali agir aliba units/establishment ajak dang tesüba küm ana (2018-19 aser 2019-20 Annual Energy Consumption indang jenjang den parnok indang annual production designated agency nem Energy Conservation Act, 2001 (52 of 2001) indang Section 14 undang clause (1) kübok Form 1 nung metetdaksüba ama agütsütsü, copy ka Bureau of Energy Efficiency nem agütsütsü, koba Energy Manager/Chief Executive Officer ajanga kuli agütsütsü.

Nüngdakba sector applicable Pro-forma mesüra Form-I ya BEE website : <https://beeindia.gov.in/content/pat-performa> nungi download asütsü.

Nisung kari danga status of annual consumption indang report ya March 31, 2021 tashinung submit mesütsütsü, pa nem Energy Conservation Act, 2001 indang clause 26 kübok temerenshi agütsütsü.

Osang tali tejangjaba metettsü asoshi onok den **011-26766700** ajanga tongtepratepang mesüra **newdc@beenet.in** dangi mail süang.

Mission Director
NMEE

DAVP 34106/11/0004/2122

Representation agütsüba atema DoSE ajanga metetdaksür

Dimapur, Chiteni/July 02 (TYO): Department of School Education kübok mapa inyaker ajak dangi Directorate School Education ajanga sangdong ka nung, mapa inyaker (employee) temi tim lenmang paidoka temaba ketdangsür nem petitions/representations agütsüba ya department-i süoki ia agitsü aser iba totuyuba nung aibelener anema tapet temerenshi agütsütsü aser Nagaland Government Servants Conduct Rules, 1968 indang Rule 4(1)(iii) aser Rule 19 nung melaba ama inyaksü, ta metetdaksü.

Nagaland Government Servants Conduct Rules, 1968 nung yamai shia lir:

"SUBMISSION OF PETITIONS: Department nung pei den atongba (immediate superior) ajanga dang ashi sorkar tenzüker shingaia sorkar mesüra temaba ketdangsür (higher authority) dangi indang indanga petition kecha magütsütsü aser sorkar petition indang copy ya danga authority dangi meyoktsüla, tatishitsü agi, shia aliba petition ya indang-indanga sendaktepa aliba authority alema danga department indang Minister mesüra Member of legislature tem nem magütsütsüla.

TEMETETTSÜ- Sorkar tenzüker kati service temeden mesüra 'conditions' dak sendakba nung timtem kar ajurua itemji bentetnüra mesüra teyari bushinüra, pa den atong temaba ketdangsür (immediate official superior) mesüra pa indang office nung tekolakba mesüra item maparen inyaktetsüba aliba iba mesükba ketdangsür jenjang teküpokba nem agütsütsüla.

Tim lenmang nung 'lower authority' ajanga item ken o magizük mesüra agizüktsü memolung mesüra senzüka yutsü mesüra menua magiba sülen ang temaba ketdangsür dangi temepishiba mesüra representation ya agütsütsüla. Item amala temepishiba mesüra representation ya agütsüba mapang tim lenmang (proper channel) ajanga temepishiba mesüra representation indang advance copy indang indanga agütsütsü akok.

Sorkar tenzüker shiaia representation ya pa/la tenüng temeja nung agütsütsüla, ta nenshia metetdaksür. Arok tejangraba atema sorkar tenzüker tem külemi (joint) representation agütsüba ya yimya meshidak amai züngshitsü aser magizüktsü, ta sangdong ajanga ashi.

F & CS ajanga metetdaksür

Dimapur, Chiteni/July 02 (TYO): Additional Director Food & Civil Supplies, Sentirena Longkumer ajanga NFSA nungi tajanzük agir aser stakeholders ajanga dang sangdong ka nung, GoI, MoCA, F & PD ajanga PMGKAY (Phase-IV) kübok ano ita pongu (July 2021 nungi November 2021 tashi) atema PHH & AAY

kübok ration card bena alir nem angati jang agütsütsü lemzüksügo, ta ashi.

Direct Benefit Transfer (DBT) kübok awabanga alirtem densema PHH & AAY kübok aliba ration card alir nisung shia nem ita shia jang seret pongu agütsütsü. Ibai ita shia NFSA kübok jang lemzüksüba ama alitsü, ta sangdong ajanga ashi.

GT Seniority List atema anogo atsülangtsür

Dimapur, Chiteni/July 02 (TYO): Taoba mapang sangdonga aliba den bendenloksema Directorate of School Education ajanga sangdong ka nung, tang COVID-19 tashidak wara aliba mechi Graduate Teacher indang 'Tentative Seniority List' dak sendakba nung pei DEOs/

SDEOs nung ashishitsü/tai aputsü kar lira, July 31, 2021 tashinung agütsütsü metetdaksür, ta ashi.

Mapang latetja aliba tsüngta nung ashishitep/tai apuba magütsütetera, iba sülen aruba ya 'invalid' ama züngshitsü aser magizüktsü, ta sangdong ajanga ashi.

TNYF ajanga Hornbill TV anema FIR benok

Dimapur, Chiteni/July 02 (TYO): Hornbill TV Dimapur ajanga osang ka prokshiba dak sendakba nung Tzurangkong Naga Youth Front (TNYF) ajanga Longtho Police Station, Mokochung nung FIR ka benoka liasü.

TNYF ajanga FIR nung shia lir. Komaser osangbener (news reporter) kati Assam-Nagaland arrtsü ladangtsütsü tashi angu, ta TNYF mangmanger, kechiaser video nung Assam Police camp yanglua aliba tenem kolak nung kozü lu anguba ya Nagaland nung lir aser Assam sorkari yangluba Border Ali mesüra Border Road nungi talangka pilar lir, ta ashi.

Nagajanka (Mariani), Assam nungi Hornbill TV indang osangbener Dip Saikia-i tawa Vikuto nung arrtsü dak sendakba tatalokba indang osang abenba mapang, Assam Police aser Forest ketdangsürtemi tang camp mesema aliba ya Assam indang litsü nung lir, ta ashi. Iba osang ya Hornbill TV ajanga June 29, 2021 nü sangdonga liasü, ta

Anungji Hornbill TV ajanga kuli tejangja memeteti iba amala osang sangdongba atema iba channel indang Editor anema FIR benoker aser aibelener nem tapet obendang agütsütsü akhanger, ta TNYF ajanga ashi.

Kiren Rijju aser Pema Khandu anema FIR benok



Kiren Rijju aser Pema Khandu (file)

Itanagar, July 2, 2021 (Agencies): Arunachal Pradesh nung political party 4-i Kimin ashishitep ken o atema Union Minister Kiren Rijju aser Chief Minister Pema Khandu anema FIR benokogo.

JD-S nungi Jarjum Ete, Congress nungi Gyamar Tana, PPA nungi Kahfa Bengia o Kaling Jeran, aser JD-U nungi Ruhi Tagung nungertemi

Kimin Police Station nung FIR benok.

Khandu aser Rijju nati Arunachal Pradesh Statehood Act, Bengal Eastern Frontier Regulation of 1873 aser Arunachal Pradesh (Land Settlement & Record) Act anema inyak, ta FIR nung shia lir.

"Iba tesem nung alirtemi memolungaka BRO-i Kimin-Arunachal Pradesh ta züluba

signboards aser nungshilung nübang" ta FIR nungsa shia lir.

BRO-i Arunachal Pradesh kübok Itanagar nungi kilometer 75 shi pilar aliba Kimin jila tenüng melenshir Assam kübok Bilgarh ta sayuba atema nisungtemi aitsür.

June 17 nü Defence Minister Rajnath Singh-i gari lenmangtem lapoktsüsü atema arudang BRO-i Arunachal tenüng nembanga liasü.

Manipur district 7 nung COVID-19 curfew atsülanger

Imphal, July 2, 2021 (Agencies): Manipur kübok district tenet nung COVID-19 curfew July 30 tashi atsülangerogo.

Anogoshia nisung aika dak COVID-19 putetba aser nisung asüba ajanga district tenet

nung curfew atsülangtsüsa aküm. District tenetji- Imphal West, Imphal East, Bishnupur, Kakching, Thoubal, Churachandpur aser Ukhrul lir.

Iba mapang Manipur sorkari talenba kar salatsüogo aser wara azüoktsü atema

nisung lokti nem vaccine agütsüsü.

July 1, 4, 7 aser 10 anogotem aonsotsü aser chiyungtsü dokantem anepdang 7:00 ako nungi 10:00 ako tashi lapoktsü sorkari temelaba agütsüogo.

Assam Governor-i autonomous college tashi itdaktsüsü atema luden ka tentet

Guwahati, July 2, 2021 (Agencies): Assam nung autonomous college tem tashi agütsüsü atema Assam Governor Prof Jagdish Mukhi-i luden ka tentetogo.

Züngsem aseme akümba ludenji education department adviser Prof. Mihir Kanti Chaudhuri lenisüba kübok asütsü, ta sangdong ka nung ashi.

Maneni, Higher Education department principal secretary B Kalyan Chakravarthy aser JB

College Principal Dr. Bimal Barah na iba luden nung züngsem asütsü.

June 29 nü Raj Bhavan nung Prof Jagdish Mukhi menden ser senden amendang National Education Policy (NEP) 2020 mapa küma inyakba nung shilem ka ama Assam nung autonomous college asem-North Lakhimpur College, Lakhimpur, Jagannath Barooah College, Jorhat aser Nowgong College, Nagaon nem tashi talila agütsüsü lemteta liasü.

Iba senden nungsa Assam nung autonomous college tem nem tashi agütsüsü lenmang bushiteptsü atema high-powered committee ka tentettsü lemtet.

Iba luden jagi NEP 2020 nung lateta aliba ama Assam nung autonomous college 3 nem tashi agütsüsü atema anogo 30 tsüngda osang agütsüsü.

Ludenisa NEP 2020 dak sendakba onüktem reprangshimtsü, ta sangdong ka nung metetdaksü.

Assam nung power auyaa agiba anema FIR benoktsü: DGP

Guwahati, July 2, 2021 (Agencies): Assam nung power auyaa agiba ken o police station ajak nung benoktsü aser iba sülen bushisüngdangtsü ta Assam DGP Bhaskar Jyoti Mahanta-i ashi.

Assam nung electricity bill memenokba aser power auyaa agiba noktangtsü atema iba telemtetba agi.

"Chief Minister-i nisung ajak nem power supply agütsüsü atema mapa inyaker. Electricity auyaa agiba ajanga loktiliba nem takoksa bentsür aru" ta DGP Bhaskar Jyoti Mahanta-i metetdaksü.

"Onoki iba ta magizüker anungji nenoki amaliteptsüla" ta DGP-i nübertem ayongzük.

"Power auyaa agiba ya ozüngi merenshitsu. Nübertemi

iba osang sangdongtsüla aser customer dang electricity bill menoktsü ayongzük" ta APDCL ktdangsur Rakesh Kumar-i ashi.

Külen, Assam sorkaria customer dang nungi electricity bill agitsü atema mapa tenzükogo.

Power auyaa agiba atema FIR 611 tashi benoka lir aser itemji teimba Mangaladai, Lakhimpur aser Nagaon nungi lir, ta pai ashi.

"Subsidy medeni Rs 511 crores bendenogo. Nübertemi electricity shitak angutsü atema sen agütsüsü aliba menoktsüla" ta Rakesh Kumar-isa metetdaksüogo.

June ita nung Rs 84 crores mendoktsü aliba nungi Rs 1,

11,000 dang nguogo, ta paisa shisem.

Taoba Congress lennir Juri Bordoloi-i BJP nung aden



Guwahati, July 2, 2021 (Agencies): Assam yimsüsür Juri Sarma Bordoloi-i tawa tu Congress party toktsü aser Hokolbarnü pai Bharatiya Janata Party (BJP) nung denogo.

Bordoloi den külemi Congress züngsem 50-i Guwahati nung aliba BJP state headquarters nung BJP nung aden.

Bordoloi ya taoba mapang Guwahati city district Congress president liasü aser paisa Mahila Congress nung ktdangpur inyakogo. Tanü lai BJP state

committee president, Bhabesh Kalita tsüngdang BJP nung denogo.

Tesüiba mapang Bordoloi-i Congress lenisüba aija liasü aser Assam Assembly election nung tamakok anguba atema parnok dak tai tongloktsü.

Congress lennir Rahul Gandhi ya loktii magizüker ta Bordoloi-isa ashi.

"Nisungtemi Rahul Gandhi parnok lennir ama meinyakdaksünür. Pa dak lenisüba tashi maliba ajanga Congress-i taoba election nung tamakok angu" ta laisa ashi.

Morigaon nung tai tongloktsür ka jena aodang injang khaloktsü

Morigaon, July 2, 2021 (Agencies): Assam kübok Morigaon nung arishi küm 9 tain tanur tetsür ka dak tashiyim agi shi nung medemer tepsetba nisung police dang nungi jena aotsü merandang injang khaloktsü.

Police-i arishi küm 65 tain Sayed Ali lendong atalokba tesemi aodang ajentsü merang saka pa dak injang agi akha.

"Tai tonglokja alisang jena aotsü merang. Police-i injang

round ana khaloktsü aser pa yirua lir" ta Morigaon SP, Aparna Natarajan-i ashi.

Sayed Ali ya Gauhati Medical College Hospital (GMCH) nung anepalutsü atema anir ogo.

June 28 nü Sayed Ali ya Morigaon district kübok Buragaon anasa apu.

June 20 nü Brahmaputra ayong anasa alu ka nung tanutsüla indang tasü mang anguba sülen nungi Sayed Ali jenshia liasü.



Meghalaya sorkari East Jaintia Hills district nung Lukha ayong yanglushitsu atema United States aser Israel nungi mongin nisungtem dang asüngdangteper ta Meghalaya Forest & Environment Minister James Sangma-i ashi.



TIR YIMYIM YIMOBILEM (EDITORIAL)

DIMAPUR KÜPTOKNÜ CHITENI (JULY) 03, 2021

Doctor-tem anogo

Küm nung anogo shia amato anogomong kaka lir saka nisungtem nem taneptsü agütsür rogo doctortem anogomong amongbabo asenok aikati mangashi aser majangshi, saka taküm 2021 kümang linük ajaklen National Doctors' Day ya July mezüing anogo nung monga aruba osang angashir. Atangji, Doctor-tem anogomong amongba yabo tanga anogomong amongba amato mapa meinyaki pelatepa amongtsüba anogo masü saka mapa inyadk mozü kidang akhi kasa anogotem amato dang shirangertem yaria amongtsüba anogo lir, kechiyong mozü ki shibanga yur doctor-tem anogoji memongtetsü. Ano, taküm küm yasa balaka alima ajaklen Covid-19 tashidak wara agi nübortem amokmerenba ajanga, mozü kidang inyaker doctor-tem aser parnok kinungertemi ajuruba timtem aser shisaboluji shirangertemi ajuruba timtem aser shisabolu dang nungibo tuluba ajurudagi. Aji oda, tang tashi nung India nung Covid wara arur külen mozü kidang shiranger yarir doctor-tem rongnung parnok 1500 shi süogo. Item rongnung tang tanabenbuba Covid wara mopong aruba mapang doctor 798 asüba osang lir. Kasa nisungsa asüyonga, alima nung medical doctor ka asübaji, tangar nisung asüba dang nungi kanga agia takoksa tuluba lir, kechiyong doctor ka asübaji nisung aika aneptsütetsüba nisung ka alima nungi pilaadoker. Aji oda, küm ana jung mejung ka tsüingda linük nung doctor 1500 süadokba takoksajibo kecha dena medemdangtsü makok. Medical doctor ka akümtsübaji temela masü, tekolok ajungyonga rongsen mekara medical mezüingtetsü aser rongsen akayonga tekolok mejungra doctor kümteptsüba mezüingtetsü, anungji doctor akümer yabo, shiba südir sang pa mesüra laji mashi nisung masü, alima nungbo nisungtem asoshi tenük agi anguba tsüingremji medical doctortem ya lir. Parnokji kotak tenyar aser parnok tekatemji Tsüingrem teka lir. Aji oda, tekolok ajungyonga aser rongsen akayonga shiranger yarir ka akümtsübaji temela masü, anungji doctor ka dakji nisung dang meimtsü tangatetba aser temulungtetba tulu alitsüla. Iba ama tangatetba aser temulungtetba jagiang, kechi koma tashidak poktetdir poktetang, metsübai aser mesempai timtem arema shiranger yaritetter. Mozü kidang inyakerter yabo sen atema inyaker masü, kechiyong parnokji ayanger masü saka taneptsürtem lir. Aji oda, parnokji nisung tasütsüba nungi shia arua taküm tasen agütsür süra, iba jenjangji sen kwi asütsü? Itemji bilemdanga tanüa asenokbo doctor-tem den doctor-tem anogo amonger ama bilema, asenok mulungjang nung doctortem nem akhümtsüba agütsüdi, parnok dang meima bilemdi aser parnok taküm aser kibong asoshi sarasademtsüdi. Aji oda, taküm doctor-tem anogomong amongba anogo yabo, parnok asoshi tenüngsangtepa amongba anogo ka masü saka mapang tatsüka tsüingda nung pei medemsor 1500 tashi Covid tongpang nung asüba purtem mangyima amongba anogo lir. Ibaji temulung ashitsüka. Item asür doctor-temji Covid mozü kidang tangoa junga mesashitet aser metsümeshidaki mapang shitak nung moutet PPE agir, amang agi sangwa kuma shiranger yarirtem liasü. Parnok süngojemtsüa mekoki shiranger yari-yariabo aniseter yipten nunga masü menden mashi ka nung amuzüka aoba noksatem asenoki nguogo. Sen kisüing atema shingaiya mozü kidang yamaji meinyaktsü. Ibaji nisung taküm kümzüksü asoshi inyakba temeim mapatem lir. Atangji, alima nung masür maliji Covid mozü kidang shirangertema aika süogo saka tasü madaka asür kinungertemi mozü kidang inyakerter nem tenüngsang agütsüba purtema liasü. Hau, tia majung, tesasatsüka tesem kar nungbo shiranger aser asür kinungertemi doctor-tem daka mejungi teka ia yirutsüba tashi atalokogo. Ibaji meimchiri meimchir memesük inyakba shisamakaba mapatem asütsü. Mozü kidang inyakerter temang aser temulungjang yirutsüba nung parnok masü asenoksasa asenok yirutsür amai lir, iba jagi asenoksa akoksatsü. Ibaji meteta nisungtemia Doctor-tem meima anepalutsüba dak alaka doctor dak teka aitsüba nung bilema mebilemstüla. Hau, atangji shiranger jungdaktsünü dang shiranger kinungeremi aiben doctortema kena anisüingzüka meyutsüi meiner aser aiben matong mabensa aser memetetba agi talila shisabolur. Idangji nisung aikati pei mit meru mesottei ain adoker aser mozü kidang inyaker temang aser temulungjang yirutsür. Ajisüaka, doctor-temi imlibilema nisungtem tensa tia aser mulungsentsüji angateta taidokdaksüner. Tang ama alima wara tesashi agi asenok amokmerenba ya ajanga tashidak nokdangba aser taneptsü mapatem ya nübortem o doctor-tem na külem longjemer inyaktsüba arok mapaa ta angatetogo. Joko doctor-temi dang nübortem timtem reprangtsüba masü saka nübortemia doctor-tem timtem aser nungdak repranga yaritsüba mapangji tang ya lir. Iba tangatetba nung asenok ajaki doctor-tem dang peladi aser parnok den akok tashi yaritepdi.

OLEMSABANG

Yimdaki Aor

- P. Alem Jamir

Khen mapang kecha meyimlai lia ajungbena nüburtem ajak pei yimdaki meyipa oa alitsüsa aküm. Pei taküm kümzüksü asoshi tia tamajung nungi ajener nüburtem shirnok pei limai meyipa aru parnok rongnungji wabong Bendangliba aser par kibong densema liasü. Bendangbai yim toktsür joko putu ana shi süir. Pa tanur asüdang yim toktsür ao saka tangbo par kibong nübener kümogo. Pai tangar kintsür agi, aji saka Aor sobaliba nung aketba ama laji bendangtsür masü saka yimtsür tajung rongnung ka ta yimertemi züngshir. Tang ajungbena par kibong sentong melenshi aser temenungratsüka tanaben yimdak alir.

Wabong Bendanglibar kibong town nung oa ali alia ki tajung sür mapang talangka yangji jangratema lia aru. Saka tang koda masüba mapang ka ajurua inyakyim ajak mebilemba lenmangi melenshi. Joko koda masü nungji par ki aser kima gate nungji dala tulutiba yok aser pei yimdaki apusoa ao. Aji oda süaka, alima mesamara yimdak nungi ano tanaben meyipa arua kiji mesemtettsü ta bilema kidang akaba oset ajakbo maben.

Oda ashitsü agi Canaan lima yawara kanga sashiba ajanga Yakober kibong khen atema Egypt-i aluba to mesüka iba ya liasü. Ashiko parnok apusoba anepdang to, asenok kopi melii tanaben Canaan lima yagi meyipa atutsü ta jembia apusor südi. Ibaji bilemteta mapangi bener arutsü nungji kenüp Bendanglibar kibong yimdaki küpzüka ao. Parnok apusodang tongtibangsa par tanurtemi parnok aliba town-ji kanga menungraa liasü. Kechiaser parnok asoshi bendang limajiang par lima aser pei senso limajiang bendang lima ama kumatoker liasü.

Anogo ana tejaklen Bendangbar kibong yimdaki shilangba sülen yimdong nung yimer kar ajurua Bendangliba den jembir:

"Hai, kua kodang aru ya?"

"Yakanü aruba ako ya".

"Kinungertema kodasa lir?"

"Tsüngremer taochi nung ajak junga lir."

"Nenok shibasa aru?"

"Ozü kibong ajak arua lirko."

"Oh ajita na? kanga junger to."

"Aser kodang meyipa aotsü bilemdar?"

"Odang mapang nem shidaktsüdi."

"Yasüing ni ner yokyasonü to ajanga süidang yangto kimung tasen ka atur ama angua to?"

"Nai angubaji shitak. Yangto ozü atema tanü nungi ki ka tenzüksü."

Aya aji kanga junger to. Yimdak ki tasen yanglur ajema kümogo. Saka taküm balaka ki tasen aika yangluba ngua kanga pelar. Taküm ya balaka bendanglen alir yimer aika arua yimdak kisen yangluba ya kechi tetezüar na? tasa bilema alir ako."

"Hau aji nai shitak ajitetogo aser tebilemla bilemer. Na meratatsü atema ni otsüji shidi. Onok alidak bendang lima nungji taküm agi küm ishika tzünglu khenyongi marur. Onok alidakji atsüki nung aonsotsü, tsünüsempangtsü aser süngdonglidong ajak anü tatsük agi asüba dang masü tzübu ajak rosepogo. Sen liaka joko tzü alia ajemtsüa mangur. Meimchirtem tzü makai koda taküm alitsü? Iba jagi taküm kümzüka alitsü asoshi yimertem tzü akadak alitsü pei yimdaki meyipa aruba lir! Ashiko alima ya yamai dang ora ano kopi melii bendang ter nung perokshia alir yimertem ajak pei limaisa adenshitsü, kechiyong yimdakbo tajemtsü tzü temerük peria dang lir."

Covid agi asenok maoksateptsüla

- T. Meren Paul, Kohima

Joko asen lima nunga tesem tesem nung tang COVID-19 wara tashidak karh putetba osang angashiogo saka kecha tesungmangtsü mali aser maoksatsüla, yaku m March/April ita nung iba tashidak agi Nagaland adong aser asen lima ajanga orr tanga taintem nunga yakümsa adong saka asenokbo tangang second wave tatemlen ang adonger, Joko 3rd wave yakta arutsü ta warning lir, Ozü kidanga ni densema onok 4 tashi COVID positive putet aser kabo anogo 16 hospital nung monger aluogo. COVID wara menaba temang nung meshidak(symptom) karh sayutsü. Temang metaba, chi mebangnangba, kecha memenemtetba, tepok aoba, aketba, terok mesakba, nükdongnükra angoba, tango mesashitetba yamala ka mesura ka bosa alitsü saka karh dakbo kecha malir aser parnok jagi tashidakji benlenshir. Symptoms kodang tera danga lider yakata Dr bushiang aser quarantine suang, tashidakji anepa adoktsü. COVID ya mesen (bacteria) masü saka metsüsem nung amongba virus (RNA) anungji anogo 9 tashi nung sua adoker ta ashir. Saka menua meyemshia mesura züzüa doktsüra tepokpok adongtsü aser azü telong kümdaktsütsü (blood clotting) aser tango mesashitet akümtsü, iba jagi oxygen nungkaker. Kanga menura ventilator nungdaker saka ventilator agiaka arena 30% ang kümzüker ta ashir. Saka asenoki symptom tera alidangyongi Dr bushia treatment agirabang anogo 10 nung positive alibaji negative arutsü. Anungji asenok maoksatsüla saka memenutsüla. Alima kenük pezüsulen iba wara dongoko, asenoka ibai mapangi bener aruba wara, saksalema SOP shidak amshira sasü anemtsü, Tsüngremdangi sarasadem nung bendi.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Nepal nung coronavirus tashidak agi pastor 130 süogo



Nepal Christian Society-i ayongzükba sentong ka nung Nepali Khristantem sarasademba noksa nung angur. Covid wara ajanga Nepal linük nung pastor 130 dak tema süogo.

July 02, 2021: Nepal nung coronavirus tashidak agi pastor 130 shi asüba sülen tang Arogo aika nung pastor mali timtemdar, ta osang ka ajanga metetdaksü.

Nepal Health Ministry-i ashiba agi, July 1 nü nisung 1,857 dak coronavirus putetba aser iba tashidak agi shiranger 33 asüba sülen tang tashi nung linük nung nisung 640,662 dak iba tashidak putetogo aser nisung 9,112 süogo.

Nepal nung taküm April ita nung coronavirus tanaben prokba sülen nisung lakh 3 tema dak iba tashidak putet aser nisung 6,000 dak tema asü.

Linük nung pastor aika coronavirus agi asüba agi Arogotem nung sannüker mali kanga timtemer, ta National Church Fellowship of Nepal (NCFN) chairman, Hanok Tamang-i metetdaksü.

Tamang-i ashiba agi, Arogo tulu kar nungbo pastor tasen melenogo, ajisüaka Arogo tilatem nungbo senpong nung sen peria maliba agi pastor tasen memelenteter.

Iba dak sendakba nung NCFN chairman-i Khristantem dang pastor tem maliba Arogotem yariang ta mepishia metetdaksüogo.

Laishir aser pastor, B.P. Khanal-i linük nung

coronavirus tashidak agi pastor tem asüba osang bendena liasü. Iba tashidak agi pastor 130 asüba dak alia pastor aser parnok kibongtem nunga nisung 500 tema dak tashidak putet.

Wara ajanga Nepal nung nisung aika mapa makai kümogo aser wara nokdangtsü atema Tenla kitem shibangba den rongsen lenmang shibangba agi züngsem aikati Arogo nem tenla magütsüteter.

"May ita nungbo anogo shia amai pastor tem süogo, ta pastor Khanal-i metetdaksü.

Pastor, lawyer aser religious freedom advocate, Gansesh Shrestha-a mapang talangka coronavirus agi shiranga aruba sülen May ita tatembanglen asü. Pai kinüngtsü den tanur ana toktsür süogo.

Nepal Christian Society (NCS) nung general secretary, Dilli Ram Paudel-i, wara mapang ita 18 jungnüa Tenla kitem shibangba ajanga senotsü agi timtema Arogo aika mali amai kümogo, ta metetdaksü.

Arogotem yamaji timtemaka NCFN aser NCS teyari ajanga Nepal nung Khristantemi pei kidang-kiyongertem yaria arudar. NCFN aser NCS nati awareness campaign

ayongzüka agiba den külemi linük nung wara anentsü atema sarasadema arudar.

Nepal nütsüng shilem 81 bo Hindu nung lir; Buddhist nütsüng shilem 9, Muslim nütsüng shilem 4.4 aser Khristan nütsüngbo shilem 1.4 dang lir.

Nepal nung Catholic Khristan 8,000 shi dang lir saka Protestant aser Evangelical Khristan nütsüngbo million 4-5 shi lir. Linük nung Arogo 12,000 shi lir aser Arogo timbaka Nepal yimtsüngtem nung lir.

Tang alima nung Khristan nütsüng kanga kera arenba linüktem rongnung Nepal densema lir.

Taküm January ita nung Nepal nung wara anenba mapang sorkari tenokdangba ajak agiena liasü, ibayongji ana tanaben iba wara prok.

April ita tomlen iba wara tanaben prokdang Nepal nung healthcare system chirepa hospital tem nung yipten agi meperi aser oxygen agi timtema liasü.

Nepal nung nisung million 1 shia anogo shia shilem 6.51 asü aser South Asia nung wara agi tamajungba kongshiba linükji Nepal aküm.

May ita nungbo Kathmandu valley kija nung anogo shia nisung 100 dak tema asü.

Congo nung Islamic kiralongrartemi Khristan 10 tepset

July 02, 2021: June 30 ayaterm nung Islamic kiralongrartemi Congo kübok Beni yim amakba mapang nung Khristan ter süogo, ta ICC-i metetdaksü.

"Telok kati ayaterm nung ki aika rongdoktsü aser parnok kidang nungi ajenba mapang nung parnok dak injang khaloktsü," ta osang ka ajanga metetdaksü,

Iba lendong atalokba sülen Brihostibarü nisung aikati longkak aitogo.

Osangbener den jembidang longkak aiterem rongnung ka-Kathembo Ngeleza-i, "Tang tashi nung onoki tasümgang ter ngua post mortem agitsü atema bener ogo," ta metetdaksü.

Tesüiba küm ishika Khristan nütsüng timba aliba linük nung Islamic kiralongrar telok aikati

timtem agüja arudar. Item telok rongnung tamajungtibaji ISIS den tesendaktep aliba Allied Democratic Forces (ADF) telok lir.

UNHCR report ajanga ashiba agi, taküm küm tetenzüklen nungi Congo nung ADF teloki timtem kanga agütsür. 2017 küm nungi tenzüka Beni area kija nung civilian 1,200 dak tema tepsetogo.

ANOGO ABEN TSÜNGREM DEN

Teti Amangang, Tatem Maka

Tsüngrem temeim lir, aser shibai Tsüngrem temeim nung alir, pai Tsüngrem dak alir. 1 Yohan 4:16

Yohani tabensa temeimji kechi rasaa ashir. Pai ashi, "Temeim Tsüngrem nungi lir" (t.7) aser "Tsüngrem temeim lir" (t.8). Kechiba Khristantemi meimer Pai kuli pungu ratetta agütsür:

- 1) Temeim Tsüngrem nungi lir
- 2) Shidakba tabensa Tsüngremer temeim anidaksü, bendanga agütsüba temeim
- 3) Khristan kulisüba teyongtsüji temeim
- 4) Temeimji Khristan teti tatem maka tejangja tekümtet lir, aser
- 5) Obendangba anogo nung temeimji Khristan temulung alemdak lir.

Yangi "alir" ta amshiba O tetezüji "iba nung mapang indokba" lir. Teti amangba tetezü tatem maka taküm nung bendanga agütsüba. Kati bendanga agütsü nung pai/lai Tsüngrem O zünga, bushia aser maneni sarasadema Tsüngrem den mapang entokbaji dang masü, saka anogo tepiyong tia ajak nung Tsüngrem lir ta metetta süidaksüba lir.

Iba tapu ajunga nung asenok kati ka den meimteptsü ajungshia zülu. Kechiba? Kechiaser asenok metemsüaka Tsüngremi asenok dang meim. Anungji asenoki kati ka den koda meimteptsü? 1 Korint 13 bilemetetang. Temeimji taremzük, anükalem, tenük mememer... ochi nung pelateper, ajak aremer, ajak amanger, ajak yimlar. Temeim kodanga majener. Shibai tangar meima alir pai/lai Tsüngrem den alir. Asenok aseni ajururtem den temeim jakla sayutsüla. Asenoki yamaji inyakdang Tsüngrem asenok den alir.

Oba, Ne temeim teti kü den aliba asoshi Ne tenüng asanger. Ni tanü ne nem bendanga agütsüdakang. Amen.

Kiyimbaji tetsür o tebur na tsüngda asütsüla: Irish Methodist Arogo

June 02, 2021: Bodhbarnü Arogoi tetsür o tetsür na aser tebur o tebur na kibong akümtsü melaba sülen Ireland nung Methodist Arogoibo, kiyimba ya tetsür aser tebur na tsüngda dang asütsüla, ta metetdaksü.

Bodhbarnü UK nung Methodist Conference nung 'kibong akümba teratet' melenshitsü atema vote agütsütep aser kasa tetsür o tetsür na, aser tebur o tebur na kibong akümtsü melatsü atema vote 254 agütsü aser ibaji anema agütsüba vote bo 46 dang liasü.

Ireland nung Methodist Arogo Conference nung General Secretary, Dr Heather Morris-i, "Ireland nung Methodist Arogo ya temeja aser tashi temeja aliba tentet ka lir. Kiyimba ya tetsür o tebur na tsüngda dang asütsü, tangatetba nungi Arogoi matsüngshir," ta metetdaksü.

Laisa, "Onoki-a maneni iba onük nung o lemtepa arudar, aser iba onük nung Khristantemi ai-aura makar," ta metetdaksü.

Ireland nungbo tongti Arogo pezüi (Catholic Church, Church of Ireland, Presbyterian Church aser Methodist Church)-i kasa tetsür o tetsür na aser tebur o tebur na kibong akümtsü memelar.

Taküm May ita nung Ireland nung Church of Scotland aser Mother church of the Presbyterian Church natibo pastor tem aser deacon temi dang melungra kasa tetsür o tetsür aser tebur o tebur na kiyimba kulizümg agütsütsü akok, ta metetdaksüogo.

Iba onük nung Presbyterian Church-i draft ozümg ka yangluogo aser taküm December 31 tashi nung Arogo timbakati agizükra maneni Arogo mongdang nung benoktsü, aser agizükra Scotland nung iba ya Arogo atema ozümg ka akümtsü.

Iba sülen Presbyterian pastor tem aser deacon temi item ama kiyimba kulizümg agütsütsü atema license meshitsü.

Church of England mesüra Roman Catholic Church natibo kasa tetsür o tetsür na/tebur o tebur na kibong akümtsü memelar, ajisüaka Scottish Episcopal Church aser United Reformed Church na nungbo ibaji melar.

Methodist Arogo ya Britain nung Christian denomination tulutem rongnung jenjang pezübuba nung lir. Methodist Arogo 4,000 dak tema nung züngsem 164,000 shi lir.

OLONG PAITEP # 5863

1		2				3		4		5
				6						
	7		8							
9					10			11	12	
			13			14	15			
16					17			18		
			19		20					
21		22								23
24										
							25			

TIPILEN		LANGTSÜNGLEN	
1. Saku	- (4)	1. Taksep	- (3)
6. Songjen	- (7)	2. Langtem	- (5)
7. Mali/Tazüng	- (4)	3. O tamendaktak	- (4)
9. Tasen apok	- (6)	4. Nütsü tebuba	- (3)
11. Songtem	- (3)	5. Anüngdang tesangwa	- (3)
13. Ata Iiasü	- (5)	6. Apitet	- (5)
16. Tzünglu den külemi tsüker	- (3)	7. Yagi jungdaksür	- (4)
17. Aso tila	- (6)	8. Anogo semer ka	- (3)
20. Tashi maküm	- (4)	10. _ _ _ tatsü	- (3)
24. Tenüng kasa jatepba	- (7)	12. Tebur kidong aser zünga kasa tsüngda jatepba	- (4)
25. Ki yangluba oset	- (4)	14. Pela agizükba tapu ka	- (5)
		15. Tenüng atet	- (3)
		18. Mejanga onü	- (5)
		19. Talak techira	- (4)
		21. Maneni	- (3)
		22. Nübo teyi	- (3)
		23. Meshi	- (3)

OLONG PAITEP # 5862 TELANGZÜBA

TIPILEN :	LANGTSÜNGLEN :
2. Anükalem, 4. Mesak, 5. Apet, 9. Meimtep, 11. Posü, 12. Patak, 13. Tekettsü.	1. Kümdang, 2. Ayak, 3. Leptep, 6. Sati, 7. Yiar, 8. Sangküm, 9. Metsük, 10. Mazü.



Alokba sarasadem Tsüngremi meyiptsür

Akokba : O Kibuba, Ni tasodang nungi tamanger ka aso, aser arishi tepyung na külema tenzüka aibelen mesüi kanga kümdanga Kodaki aotsü meranga arudaki, Saka ni terataba toluka lir kechiaser Lai nunga ashir aser sayutsüngiria ashir na tanüla kümzüker liaka samaba san kardanga anir marura Kodak yimli majangzüksü ta ashir, Kibur Ozü Naga Lima ya Khrista asoshi aser Naga nunger ajunga 100% Khristan lir, Oba naia bilemdangangma Khristani Khristan anir arutsü masüji joko ozü Lima atena or asom lenten nungi tenzüka samaba santem anir arudi ta tenzükdang nungbo parnoki tepsetdi ta arishimesor, aser atangji nung tepseter. Anungji kechi koda samaba santem anir arutsü Kibuba!!!

Joko ni tambur akümer ne dangi arutsü mapang atonger saka kü ket nung san ka danga mali koda asütsü?

Kibur : O Alokba, nai samaba san bushidang na kong kechi yirua ali? Nai san bushidang parnoki na tepsetdakjang, Idangji na kodak ajangzüksü, Saka Alokba nai ner kibong santem tamasa anir arung!!!

Lilir : I. Kilang Ajem, Indisen, Dimapur.

TANÜBO NAI LANGZÜANG

Q. Andhra Pradesh ajanga tenzüka SALT Programme ya küm _____ atema lir.

A. 5 Yrs B. 2 Yrs C. 3 Yrs D. 4 Yrs

===== (Taruba adok nung onoki langzüksü)

YASHI ADOK TELANGZÜBA : 1,000 to 2,000 kilometres

AO OSHI ANGAZÜKDAK:
TANÜ ANGAZÜKTSÜBA OJANG

Kensa
(v) aon ama chiyongsü mejungi tanük küma tushia raksatsüba (stir roughly by spoon over curry type food items)
* Ango aon soa yur tekolak bushidang tanurtemi aon ajak kensa.

Kentet
(v) telong nung ia aliba agitet (tear out)
* Aonpo nungi kentet, tetezü lendong nungi kümzüik.

NAI-A YA METETTER MA?

EURO ASAYAMUNG TAKOK NGUR ALIR TEAM TEM:

1960	Soviet Union	1992	Denmark
1964	Spain	1996	Germany
1968	Italy	2000	France
1972	West Germany	2004	Greece
1976	Czechoslovakia	2008	Spain
1980	West Germany	2012	Spain
1984	France	2016	Portugal
1988	Netherlands		

SUDOKU # 5903							TELANGZÜBA # 5902									
8	1						2	8	5	6	7	9	4	1	3	
9	7		8	1			7	6	1	8	3	4	2	9	5	
	6	7	9	3	1	4	4	3	9	1	5	2	6	8	7	
9	5	6	2				6	4	3	7	9	8	1	5	2	
6	4		1		8		1	5	2	4	6	3	8	7	9	
				5	7	9	6	8	9	7	2	1	5	3	4	6
2		8					5	7	8	3	2	1	9	6	4	
6	9				3	8	3	1	6	9	4	7	5	2	8	
5				4		2	9	2	4	5	8	6	7	3	1	

OJANG LUTEP # 5448

TTESEEEEMPPAR :

NNISUG :

AAN :

UNGTLEEM :

SYUAA :

AANNGGLB :

KA :

NNUG :

KEMÜLI :

ONCIYGH :

OJANG LUTEP TELANGZÜBA # 5447

TZÜMETSÜNG AODANG SÜNGDI LUNGTI PONGER
ALUA AYONGJI TEZÜI AYIMTSÜ AKOK

TAN HOPTA ATEMA - KOMA SÜLA ?

Q. Impur Mission Hospital ya ABAM-i lenmang bushitepa Community Health Centre jenjang tashi danga tua lapoktsü lenmang bushitep nung koma süla ?

Olong 20 shi nung July 02, 2021 tashi nung iba telangzüba ya onok dangi (e-mail - tiryimyim@gmail.com) :
(SMS - 9856121232 / 9436072422) : (WhatsApp - 7005723372 / 8729995804) : (tiryimyim.in) ajanga yokang. Telangzubatemi taruba Honibarnü adoktsüsü.



July 02, 2021
 nü Amritsar
 n u n g
 C o n g r e s s
 p a r t y
 züngsemtemi
 petrol aser
 diesel jenjang
 atuba anema
 longkak aitba
 noksa nung
 angur.

PETA-i PM Modi dang shiruru tenla agütsüba nokdangtsü mepishi

Chennai, July 02 (Agencies): People for the Ethical Treatment of Animals (PETA) India-i shidi ka ajanga Ato kilonser, Narendra Modi dang Prevention of Cruelty to Animals (PCA) Act, 1960 kübok Arrla 28 agentsü mepishiogo.

Iba Arrla nung tamangba yimsü dak sendakba nung shiruru mashie tepsettsü temelaba agüja lir.

July 20-21 anogotem nung Muslim nunger Eid al-Adha benjung amongtsü lia PETA-i linük nung shiruru tenla nokdangtsü mepishir.

Eid benjung mapang nung napong aser san den tanga shiruru aika tenla agütsür.

Tang Centre sorkari PCA

Act yanglushitsü bilemdar. April ita nunga PETA India-i Animal Welfare Board of India (AWBI) den tebilemba onük kar lemsatepa liasü, item onük rongnung shiruru tenla agütsüba nokdangtsü densema lir.

PETA India-i, shiruru tenla agütsüba melaba ya PCA Act anema lir, kechiyong menüngdakba nung shiruru kanga timtemdaksür, aser iba ya tanü putu den mapet, ta metetdaksü.

PETA India chief executive officer, Dr Manilal Valliyate-i, "Nisung taküm ka tenla agütsüba tangbo 'nisung tepsetba' ta züngshir. India-i space missions atema inyakba putu nung shiruru tenla agütsüba

ya taochi maketba mapa lir aser temerenshi agütsütsü tetemsü. Onoki Modi dang linük nung shiruru tepsetba nokdangtsü mepishir," ta metetdaksü.

"Nisung aikati shiruru meyirutsür saka rongsen, süoshi aser süngjanglijang tenla agütsür," ta paisa ashi.

PETA India-isa state aser union territories ajak nung directors general of police dang Eid mapang nung shiruru shibelenba aser tepsetba nokdangtsü atema inyakdaksüner, ta mepishiogo.

India nung yimsü dak sendakba nung shiruru aika tenla agütsür, item rongnung san, napong, jang, an, ak, mesü, shirong aser pokpo densema lir.

India nung Covid agi asür lakh 4 jungogo

New Delhi, July 02 (Agencies): India nung ano nisung 46,617 dak coronavirus putet aser tang tashi nungbo linük nung nisung 30,458,251 dak iba tashidak putetdago, ta Hokolbarnep Union health ministry-i metetdaksü.

Tesüiba ghonda 24 tsüngda India nung ano nisung 853 asüba sülen linük nung iba tashidak agi asür lakh 4 jungogo; alima nung coronavirus tashidak agi nisung lakh 4 dak tema asüba linük asemji US, Brazil aser India linüktem dang lir.

Tang tashi nung India nung coronavirus agi nisung 4,00,312

süogo, US nung lakh 6.05 aser Brazil nung nisung lakh 5 süogo.

Tang linük nung coronavirus agi teshirangdakpur 5,09,637 dang kümogo, aser ibaji coronavirus caseload nungi shilem 1.67 dang lir.

Brihostibarnü samples 18,80,026 tendangogo aser tang tashi nungbo samples 41,42,51,520 tendangogo, ta Hokolbarnep ICMR-i metetdaksü.

Anogo shia coronavirus positive putetba shilem 2.48 dang kümogo aser tesüiba anogo 25 tashi positive putetba shilem 5 den tajemba lir, ta Health Ministry-i metetdaksü.

Pulwama nung raradang LeT kiralongrar pongu den sepai ka asü

Srinagar, July 02 (Agencies): Hokolbarnü Jammu & Kashmir kübok Pulwama district nung Lashkar-e-Taiba (LeT) kiralongrartem aser security sepaitem tsüngda raradang kiralongrar pongu kaset aser sepai ka süogo.

Iba tatalokba sülen security sepaitem district kübok Hanjin yim longbanger kiralongrartem mita bushidar, ta police ketdangser kati metetdaksü.

Sepaitem kiralongrartem mita aoba mapang nung

kiralongrartem tama injang khaloktsüba sülen telok ana tsüngda khatap tenzük. Raraba mapang nung sepai ka mejungi yiruba sülen hospital nung treatment agiba mapang nung süogo.

Raraba tesem jagi sepai tali yoksemba sülen kiralongrar pongu kaset, ta paisa metetdaksü.

Kiralongrartem maitsüji jangjatsü merangdar; parnok ajakji Lashkar-e-Toiba telok nungi züngsemtem lir, ta paisa metetdaksü.



STATE FUNERAL

of



LT. SHRI TOSHI WUNGTUNG
 Hon'ble Advisor, Information & Public Relations, SCERT & Village Guards.
 August 20, 1964 - July 1, 2021



Date
03.07.2021

Time
08:00 A.M.

Venue
H/No. 903, Model Colony, Lane -1
Purana Bazar, Dimapur

Order of Programme

Chairperson : Shri. Abhijit Sinha,
Principal Secretary, Home

Invocation : Dr. James,
Pastor, Yimchunger Baptist Church, Diphupar 'B', Dimapur

Eulogies : 1. Shri. Sharingain Longkumer,
Hon'ble Speaker Nagaland Legislative Assembly
 2. Shri. Neiba Kronu,
Hon'ble Minister, Planning & Parliamentary Affairs
 3. Shri. T. R. Zeliang,
Hon'ble Leader of Opposition
 4. Shri. Chingwang Konyak,
Convenor, PDA & President, NDPP

Hymn : It is well with my Soul

Short Speech : 1. Eastern Nagaland Legislators' Union (ENLU)
 2. Eastern Nagaland Peoples' Organisation (ENPO)
 3. Shri. Kekongchim Yimchunger,
Advisor ENPO
 4. Yimchungru Union Dimapur (YUD)

Song : Ms. Shiren Quinker (Niece)

Time for the Family : 1. Smti. Lipokla Toshi Wungtung (Wife)
 2. Shri. I. Toshitsungba Aier,
IPS (Retd) on behalf of in-laws
 3. Shri. Doku Kecham (Elder Brother)

Laying of Wreaths

Word of God and Benediction : Rev. T. W. Yamyap,
State Chaplain

GUARD OF HONOUR

Pianist: Ms. Akumara Ozukum

Zambia taoba tir Kenneth Kaunda den tepila sentong agiogo

Lusaka, Chiteni/July 02

(Agencies): Zambia linük tentenba mapan tir inyaksang aser African nationalism busemsang, Kenneth Kaunda asüpila sentong nung adentsü asoshi mangyimertem linük yimtiba, Lusaka nung aliba stadium ka sünga adenshi.

Taoba ita arishi küm 97 nung asüsang taiba tir indang asüpila sentong Hokulbarnü agidak continent nungi lenir aika arua dena liasü.

Nisung 60,000 amentsü atema yangluba National Heroes Stadium nung tasü mang süngten ka Zambia nisan agi aleper gun carriage kati bener arua yutsü.

Iba sentong nung adenertemi COVID-19 social distancing yimya amshia romal temesüng ayiploksü aser military band ka ajanga mangyim ken tena liasü.

Southern Africa nung temesüng nisungtemi yimsü asüba mapang nungtugu akumsang Kadunda ya pneumonia agi shiranga June 17 nü military hospital ka nung süa liasü.

Pai teti romal (handkerchief) temesüng ka bener jaja aser iba temaitsü ya temeim aser yimjung lir, ta pai ashi. Pai romal temesüng ya nüjiso asoshi nokdaka tepuokdak ayuba mapang nungi amshia liasü.

Lusaka asüpila sentong nung Zambia Tir Edgar Lungu den South Africa Tir Cyril Ramaphosa, Zimbabwe Tir Emmerson Mnangagwa, Kenya Tir Uhuru Kenyatta, Ghana Tir Nana Akufo-Addo aser taoba mapang Zambia yimsü asür tenüng nung Britain indang Africa minister James Duddridge nungertem dena liasü. Kaunda dang ya KK ta ajar, aser pa ya 1964 küm October ita linük nüjiso ngur Zambia indang tir ama küm 27 inyaka aru.

Pa ya left-of-centre United National Independence Party nung tekolakba liasü aser continent nung danga linüktem nungi nüjiso asoshi rarar yaria liasü.

Saka linük nung pai tashi tali amshia aser opposition party ajunga nokdangba ajanga pa sentsü ajema akum.

Tatensa 1991 küm party balala nungi election agia trade unionist Fredrick Chiluba-i tsükdaksü.

Pa asüba sülen Zambia nung mangyimba mapang sangdonga nisan ton nung sendaka ayu aser nüburtemi akum agütsütsü mechi pa tasü mang ya linük sema bener jaja.

Pa temang ya Lusaka nung cabinet office anasa linük tir tasü mang aremdak taruba Bodhbarnü aremtsü.



Canada nung Manitoba province indang yimtiba, Winnipeg nung longkak aitertemi Queen Victoria indang kerakyanglu ka raksatsür aliba noksa nung angur. Tawa Canada nung lisopur indng residential school ka nung tanur indang leper aika ngutetba sülen nüburtemi tejashi nung July 1, 2021, Canada Day nung longkak aita iba kerakyanglu ya raksaja liasü.

Tigray dangi teyari yokba menokdang: Ethiopia

Addis Ababa, Chiteni/July 02

(Agencies): Northern Tigray region nem humanitarian aid agütsüba menokdang, ta Ethiopia sorkari ashi aser chiyongtsü peria manguba ya nok-nü ka amai amshir ta aijaka parnoki akok tashi ki-o-jen yanglushitsü meranger, ta ashi.

Eritrea den arrtsüa aliba region yimsü asüba telok, Tigray People's Liberation Front (TPLF) ajanga ita ti jungnüa raraba sülen Tigray yimtiba, Mekelle par küboki aitogo, ta hopta tetenzüklen shia liasü.

Ethiopia sorkari ceasefire sangdong, saka TPLF ajanga ibai asayamenü ka lir, ta ashi.

Telok ajaklen atsü-anem akatsü atema linük balalai ajungshiba mapang tesem kar nung maneni raraba osangtem lir.

"Teyari balala magütsüdaksü Tigray nübur tango mesashiteter aser chiyongtsü nokdanga nüburtem yadaksüba ya hadir ka ama amshir ta tai tongloksüba ya tamangtsü maka," ta Deputy Prime Minister Demeke Mekonnen-i Addis Ababa nung diplomat tem dang Hokulbarnü ashi.

"Onoki ki-o-jen raksar aliba tanaben yanglushitsü atema akok tashi meranger aser electricity, telecoms, internet aser banking services tem yanglushitsü meranger. Item tongtipang ki-o-jen nung TPLF temi maneni tenük yoker amaker, anungji nüburtem nem timtem majurui service agütsütsü kanga tasak akumer," ta Mekonnen-i ashi.

Tigray region nung yimsü süa

aliba party ajanga federal military bases nung amakr, ta Addis Ababa-i tai tongloksüba sülen 2020 küm November ita nungi Ethiopia sepaitemi kidangr linük, Eritrea nungi sepaitem teyari agia TPLF den rara arur.

TPLF indang osangbener Getachew Reda-i hopta tetenzüklen osangbener dang, sorkari maneni services tem shibangtsüba atema aitsür aser nüburtem yasa-tzüra nungi kumzüksü atema linük balala nungi teyari agitsü renema lir, ta nenshia ashi.

Tigray nung nisung 350,000 shi ayawara tia nung lir, ta taoba ita United Nations ajanga shia liasü. Taoba hopta US Agency for International Development ajanga asadangba nung nisung 900,000 liasü.

Küm 20 sülen Bagram airbase nungi US sepaitem ainshir

Kabul, Chiteni/July 02

(Agencies): Küm 20 jungnüa lir United States mitkartem Afghanistan indang Bagram airbase yutsüogo, ta US ketdangsur anati ashi, koba Taliban atsüngdoksü aser 9/11 lendong agütsür al-Qaeda bushiba mapang tiyongtsü ka liasü.

Iba tayimtsü anendak tesem ya Afghan National Defense aser Security Forces nem bendanga agütsü, ta lenir ana yagi Hokulbarnü metetdaksü saka tena tenüng mashi, kechiaser iba osang sangdongtsü tena dang memela.

Afghanistan nung US sepaitem rongnung tematiba, General Austin S Miller ya tang tashi sepaitem kumzüka ayutsü asoshi tashi lir, ta ketdangsur kati ashi.

Afghanistan yimtiba, Kabul nungi north tsütsü kilometer 50 shi pilar aliba Bagram airbase nungya mapang kabo US sepaite 100,000 dak tema ajanga

süyia liasü.

Honibarnü sentong ka nung iba tesem ya sorkar nem amoktsütsü, ta Afghan ketdangsur kati ashi.

Iba tayimtsü anendak azüngtsüba tetetzü Tir Joe Biden-i Afghanistan nung par sepaite 2,500-3,500 shi aliba ajunga September 11 tashinung anizüker aotsü ta nangzüka aliba mapang matongdang anizüker omar mesüra tomar amai sayur.

US-i tatem maka rara tembangtsü ta April ita tiyonglen sangdongba sülen par linük July 4 nü Independence Day amungba mapang US sepaite aser NATO sepaite 7,000 shi ya anizüker omar amai sayur.

Tan hopta tashinung NATO sepaite timba Afghanistan nungi ainshio.

2001 nung US-i Afghanistan amakba mapang NATO telungjem nung atatepa aliba ama masü, Europe nungi sepaitem ya timba sentong tila kar dang

agir ainshi amai ajiteter.

Security mechi US-i par sepaitem tatembangba ya kodang Afghanistan yutsür aotsür mashi, saka Kabul nung aliba Hamid Karzai International Airport anükba maparen tang tashi metembangba lir. Turkey aser US sepaitemi tang iba airport ya nüka lir.

Afghanistan yimtiba nung aliba embassy anüktsü atema US sepaite 6,500 shi lir.

Taliban teloki linük tesem kar nung maka district ter dak tema agia aoba mapang US aser NATO sepaitemi Afghanistan yutsür aor.

Khuret kaji, taoba mapang azüdokshi lendong agüja aliba militia tem den Afghan security forces yaritsü atema sorkari asendenshia tesendaktep akar.

Tan hopta osangbener senden tatembangba nung jembiba mapang, tanen makai azüdokshiba ajanga Afghanistan nung civil war adoktsü akok aser iba atema

alimai khure abentsüla, ta General Miller-i shia lir.

Taoba ita Biden-i Afghan Tir Ashraf Ghani dang, "Tarutsü nung Afghan nungeri koma süner, ibaji parnoki lemtetsüla," ta shia liasü.

Ghani-i tang pa mapaji US ainshiba sülen metokmeperi ajangshiba ketdangtsü ya lir, ta ashi.

US sepaitem Afghanistan nungi anizüker aotsü atema Taliban den tezüngzüktep ya taoba Tir Donald Trump mapang yanglua liasü.

US sepaitem anizüker aoba temelen Afghan li nungi telungpur teloktemi linük balala amakba Taliban-i nokdangtsü nangzü.

Parnoki Afghan nung par anemer den yimjung ken o jembitsü nangzü, saka terenlok kangabo mali.

Afghanistan amaker Bagram-i arur aoba ya tang agi tanabuba lir.

Taoba mapang Soviet Union ajanga iba tayimtsü anendak tesem ya 1950s

mapang yanglua liasü. Communist sorkar ka nungittsü mechi parnoki 1979 nung Afghanistan amakba mapang iba tesem ya parok atema tongtipang akum.

Küm ter shi Soviet nungeri US-i yariba "mujahideen" den rara liasü, shirnok Cold War tatembangba nung parnok ya frontline force ka ama Tir Ronald Reagan-i agizüka liasü.

US aser NATO ajanga 2001 küm Bagram senmang amangba mapang iba tesem ya kanga mejungi raksar liasü.

Iba tesem nung tayimtsü ayamesoba (runway) ana liasü. Yangji tesüsa runway feet 12,000 talang ya 2006 küm sen million \$96 agi yanglua liasü. Yangji revetments 110 lir, koba tayimtsü anena ayutsü atema amshir.

Yangji yipten 50 aliba mozüki ka, operation theatre asem aser dental clinic ka lir. Kasa tesem nungya tepuokdak tesema ka lir.

Mon DC ajanga tetuyuba talila metetdaksür

Mon, Chiteni/July 02, 2021 (TYO): Home Department, Nagaland State Disaster Management Authority ajanga June 30, 2021 nü agütsüba tetuyubatem aser June 18, 2021 nü agütsüba Office Order nung maneni anidaka, June 30, 2021 nü DC Mon, Thavaseelan K, IAS-i sangdong ka ajanga, Mon District nung July 10, 2021 tashi lockdown temzüng den teküboklen maparen kar lapoktsü aser tetuyuba talila nung anidaksü, ta metetdaksür.

1. Nüngdakba osettsüset ayokba dokantem aser shishilembaba tesemtem anepdang 6:00 ako nungi nikongdang 2:00 ako tashi lapoktsü melar.

2. Dokan shia nung amener/inyaker ajak vaccine agiba indang osang tejangja sayutsüla. Kasa mapang, Block Task Forces/Ward Task Forces/

Village Task Forces temi dokantem mita aotsü aser reprangshimtsü. Iba ya nüngdakba maparen ka lir.

3. Kou mejepeba dokan aser saloon nung inyakertem vaccine agir sülen ang lapoktsü melatsü. Iba dak sendakba nung dokan (barber aser saloon) kiburtemi timAdministrator, Town Council mesüra Area Administrative Officer dang application agütsütsü akok, aser kuli tejangja ngur sülen ang maparen awawa inyaktü asoshi melatsü.

4. District nung Sorkar Office ajak staff shilem 50% dena mashi anogo nung lapoktsü akok aser office mapang COVID-19 dak sendakba mera ajak nung anidaktüla. Sorkar tenzükbaba wadang nung inyakertem, shirnok Office-i marur, parnok pei pei kidang nungi inyaktü aser rongdak office maparen atema phone/

mail ajanga tongteprateptsü.

5. Aonung 7:00 nungi anepdang 4:00 tashi nisung/gari senzüsönbongba nokdangtsü.

6. Public transportation aser non-essential services atema district balala tsüngda senzüsönbongba maneni nokdangtsü.

7. Kiyimba, asüpila aser sports training nung nisung 50 tashi adenshitsu melar aser mapang shia COVID-19 inyakyim benshiba den SOPs sülen anidaktü.

8. Tamangba yimsü dak sendakba tesemtem/tenla ki nung nisung 50 tashi adenshitsu melar aser COVID-19 inyakyim benshiba den SOPs sülen anidaktü.

9. Taoba mapang Office Order ajanga sangdongba ama, district nung garitem ODD-EVEN yimya nung maneni jajatsü.

Dimapur Police-i nisung tepseter ana apu

Dimapur, Chiteni/July 02, 2021 (TYO): Arishi küm 48 tain Bipul Boruah tepsetba atema, Brehostibarnü (01.07.2021) Dimapur Police-i Manoj Deb (48) aser Ranjit Debnath (50) na puogo. Dimapur kübok Old over-bridge area, Burma Camp nung Bipul yagi kidang amshiba osettsüset kar auya alitsü ta temulung melemi bilema pua alir Manoj aser Ranjit nati pa dak kanga mejungi azükba sülen, mozüki nung pa (Bipul) asü, ta Addl. Dy. Commissioner of Police (Crime) & PRO

sangdong ka ajanga metetdaksü.

Post Mortem maparen tembanger sülen, tasü mang ya kinunger nem agütsüogo. Iba dak sendakba nung, East PS, Dimapur nung ken o ka benokogo.

Kasa anogo, Sema-tilla tesem nungi Scooty ka auyaba atema Dimapur Police-i Depanker Chaudhury puogo. Depanker ket nungi iba Scooty nguteta liasü. Scooty auyasang Depanker anema SBN PS, Dimapur nung ken o ka benokogo.

Maneni, kisü-jensü dang

amshiba osettsüset tem bener aliba truck ka auyaa aser item oset agizüka bener aoba atema, 28.06.2021 anogo, Dimapur Police-i nisung 8 apu. Pua alir temji - Kamal Sutradhara (30), Vito Muru (31), Kato Zhimo (28), Abulovi Zhimo (28), Ghunavi Chishi (25), Zhekugha Shohe (33), Tovi Yeptho (32) aser Jabir Hussain (30) nunger ta jangjaogo. Parnok ket nungi .32 pistol ka ngutet. East PS, Dimapur nung parnok anema ken o ka benokogo, ta kasa sangdong nung shia lir.


National Film Awards UK: Rowan Atkinson-i takok angu

London, Chiteni/July 02, 2022 (Agencies): National Film Awards UK sentong nung takok angur rongnung Rowan Atkinson, Kate Beckinsale aser Ricky Gervais nunger dena lir.

Motion picture industry tsütsü shilem tajung agirtem jangjaa aser parnok nem tenüngsang agütsütsü nükjido nung, Brehostibar (01.07.21) London kübok Porchester Hall nung iba sentong ayonga agiogo. Nüngtugu actor, Rowan Atkinson-i shilem tajung agiba asadanteta, iba award sentong nung pa nem Global Contribution to Motion Picture aser Lifetime Achievement Award agüja tushio.

'Johnny English' nung tongti shilem agisang, Rowan-i, "iba tetushi award agizüktsü maongka anguba atema National Film Academy dang pelaba metetdaksür aser acting wadang nung ajemoker külen nungi fans kwinkati ni nungita yaria aruogo, nenok ajak dang pelaba shisemer," ta lemsatetep.

Kate Beckinsale-i 'Farming' nung shilem tajung agiba atema lai Best Actress Award takok angu. Kasa mapang, Netflix comedy series 'Afterlife' atema Ricky-i Best Screenplay



award agizük.

"Taküm indang National Film Awards UK nung Best Actress Award atema ni shimba asoshi pelaba lemsatetep. Tsüngdong aruagi iba award agizükner, saka Covid-19 quarantine' ajanga tebilemba matalok," ta Kate-i lemsatetep.

"Iba film nung cast ajak dang pelar aser Damson Idris dang alakteta pelaba shisemer," ta Kate-i ashi.

Iba sentong nung award angur rongnung, Vanessa Redgrave dena lir. Lai Outstanding Achievement Award nguogo.

Mathew Horne-i 'Gavin & Stacey' atema 'Best Actor in a TV Series' aser 'Years & Years' atema T'Nia Miller-i 'Best Actress in a TV series' award takok angu.

* 2021 National Film Awards UK nung takok angurtem:

- Best Actress sponsored by GLabs : Kate Beckinsale (Farming)
- Best Actor sponsored by Eden Perfumes : Adewale Akinuoye-Agbaje (Farming)
- Best Newcomer sponsored by Urban Veda : Mhairi Calvey
- Best Actress in a TV Series sponsored by Initio Perfumes : T'Nia Miller (Years & Years)
- Best Supporting Actress sponsored by Storm Label : Gemma Jones (Rocketman)
- Best Actor in a TV Series sponsored by RICH Prosecco : Mathew Horne (Gavin & Stacey)
- Best Supporting Actor sponsored by Heart of Suffolk Distillery : Khali Best (Blue Story)
- Best Drama sponsored by Dechavel : Farming
- Best TV Drama Series sponsored by Heineken : Beecham House
- Outstanding Achievement Award sponsored by Initio Parfums : Vanessa Redgrave

**LAND FOR SALE
at Indisen Village
Contact:
7005022779**



Office of the Ungma Senso Mungdang Nagaland TENÜNGSANG AGÜTSÜR

Ungma Senso Mungdang office ajanga agüja aliba lenir aser wadang balala nung inyakertem, nenoki Ungma Sensosanger nem takok tulu ngua konang tetushi bener arutsü nung sensoi nenok ajak nem tenüngsang agütsür.

1. Wb. Sharingain Longkumer, Hon'ble Minister (NLA) for being nominated into Committee of the Presiding officer, 'To review the power of presiding officer under the tenth Schedule of the constitution and the rules made there under'.
2. Wb. Imsapang Imsong, S/o Mr. Sanglimong Imsong, promoted to Mechanical Engineer Mokokchung, Nagaland.
3. Wt. Guru Senlitola, W/o Mr. Alempokba Jamir, GURU SHISHYA PARAMPAKA KENDRA NORTH EAST ZONE CULTURE CENTRE, Dimapur Ministry of Culture Govt. of India nungi nugtet.

Tsüngremi asen lenirtem nenok wadang balala nung inyakdang maneni len ania moajangma.

Sd/-
Tiajunga Lkr Tatar
President

Sd/-
Senmoaba Imsong
General Secretary

OFFICE OF THE YAONGYIMSEN VILLAGE COUNCIL (RIONGSANGER TATAR)

PELABA METETDAKSÜR

Tanü asen lima COVID-19 wara agi Urban to Rural transmission tenzükbaba ajanga nüburtem ajak kanga dang tsübuseta iba wara nungi asen yimtsüng küzmzüka ayutsü merangdang asen senso tajung Shri.T.M.Longkumer, Superintendent, Central Goods and Services Tax, Dimapur CGST Commissionerate, par kibong ajanga 30th June 2021 anogo COVID-19 dak sendakba nung amshitsü osettem teperi yimtsüng tonga bener arutsüa tenla tulu agütsüba asoshi Riongsanger Tatar ajanga kanga dang pelaba metetdaksür.

Mapang aben nür kibongi asen yimtsüng nüngdak balala peridakja yariba asoshi maneni pelaba lemsatetep. Tulusang Tsüngremi nür kibong maneni moajangma ta sarasademtsür.

List of Articles received:

1. 2 liters Kisan Kraft Spraying machine	20 Nos.
2. 5 liters EnvoUser-5	19 Nos.
3. 5 liters HandUser-C	4 Nos.
4. PPE Suit	20 Nos.
5. Prima Gloves (For use with PPE suit)	20 Nos. (10 packets)
6. FFP 2 Honeywell Mask (For use with PPE suit)	20 Nos. (2 packets)
7. Fillflo Face Shield (For use with PPE suit)	20 Nos.
8. Mylab Coviself COVID-19 Rapid Antigen Test kit	6 Nos.
9. Cubby Protective Safety goggles	20 Nos. (2 packets)

Sd/-
NUNGSANGTOBA
Chairman
Yaongyimsen Village Council

Taylor Swift-i 'Renegade' ken saya



New York, Chiteni/July 02, 2021 (Agencies): Big Red Machine nungi Aaron Dessner aser Justin Vernon na den Taylor Swift longjemmer atenba ken tasen ka sayaogo.

'Shake It Off' ken atenla Taylor-i The National star den longjemmer 'Renegade' ken zülua liasü aser Bon Iver band züngsemtem iba track nung dena lir.

Aaron-i Taylor Swift indang 'folklore' aser 'evermore' kensep zülua aser yangluba sülen, Renegade atema pai tanaben Taylor den longjemogo. Kasa mapang, Justin-ia 'folklore' kensep nungi 'Exile' zülua tenogo aser 'evermore' indang title track nunga pai yariogo.

"Aaron Dessner den tanaben longjemmer ken atema maparen takok ngua inyaktetba ya ni mamangteter. Kü taküm nung

pa ajuruba ya temoatsü ka ama lir. Pai mapang shia tasa tasen balala amshia music yanglur aser pa dang nungi ken yangluba yimya aika angazükogo. Pa dak ajemalua shisatsü lir aser mulungsoa yaritsü tanela lir. Ibayongji artist aikati pa den longjemmer project yanglutsü asoshi maongka bushir. Tang, pa den longjemmer Renegade ta nüngja agütsüba ke ka yangluogo aser iba ken nung Justin Vernon dena lir. Iba ken nung tanaben longjemtsü maongka anguba atema Aaron dang pelaba shisemer," ta Instagram ajanga Taylor-i lemsatetep.

'Big Red Machine' ken ya Taylor aser Aaron na indang kensep tanabuba - 'How Long Do You Think It's Gonna Last?' nungi agiteta yanglu, koba August 27, 2021 nü iba kensep sayatsü renema lir.

WTA aser ATP schedule nung Asian asayamung athir

Los Angeles, Chiteni/July 02, 2021 (Agencies): Japan aser China nung Covid-19 wara dak sendakba nung tebilemtsi adokba aser senzusenbongtsü nokdangba ajanga, taküm küm tatemlen linük anaprongla nung ayongzüksü aliba WTA aser ATP Tours thitsür, ta Brehostibarnü sangdong ka ajanga jangjatsüogo.

Renemba schedule balala nung ajemdaker, WTA aser ATP ashiba agi, Beijing nung China Open aser Tokyo nung Japan Open anaprongla agienogo.

Anüolen tip China tsütsü Shenzhen nung WTA Finals dak alaka, China aser Japan nung asayamung ajak thitsütsü. WTA Finals asayamung atema jembishinüdar, ta WTA-i ashi.

Ano külen, Indian Wells, California nung BNP Paribas Open, koba October 10 nungi 17, 2021 tashi asayatsü anogo yanglushiogo, iba asayamung asayatsü lia, October tetenzüklen Shanghai Masters asayatsü akok, ta ATP-i ashi.

Coronavirus wara süshia

maoba ajanga taoba küm (2020) Indian Wells asayamung thitemja liasü aser taküm March nungi iba asayamung ayonga asayatsü asoshi anogotem melenshia aruogo.

"Taküm China aser Japan nung WTA indang world - class asayamung tem masayatetsüsa akümba ajanga onok kanga mepelar," ta WTA chief executive Steve Simon-i ashi.

"Thitsür aliba asayamung tem taküm küm ayongzüksü asoshi bendanga agütsür lenmang kar bushiteta aser WTA den maneni amalitepa aruba asoshi asayamung ayongertem dang onoki pelaba lemsateper. Thitsür aliba asayamung tem (ATP aser WTA Asian events) 2022 küm mapang tetemjen ka nung takok ngua achaayanga ayongzüksü imla atar," ta Steve-i ashi.

2021 calendar nung talila asayamung bendenlokba WTA-i sangdongogo. Tennis calendar nung bendenlokba asayamung rongnung Chicago Women's Open (August 23 nungi

tenzüksü) dena lir. New York nung US Open tenzüksü lia, iba asayamung asayatsü.

ATP-i ashiba agi, taküm April ita nungi anogo atsülangja arur külen nungi, Marrakech nung asayatsü aliba Grand Prix Hassan II asayamung 2021 küm atema thitemtsüogo.

Indian Wells achaayangertemi ashiba agi, iba asayamung atema senpet sen - million 15.3 agütsütsü renema lir, koba coronavirus tensa ajangshia arur külen nungi Grand Slams sabang adena ATP aser WTA asayamung teloktep atema senpet sen timtiba alitsü.

Maneni, Indian Wells Tennis Garden telungi aita asaya reprangtsü asoshi, asayamung nung adener fans, media, staff aser sponsor ajaki vaccine agiba kuli tejangja sayutsü nungdaker. Kasa mapang, asayamung ayonga asayaba mapang, tesem nung Covid-19 tensa asadanga Covid-19 test agitsü aser tejak nembangba mask inoktsü asoshi tetuyuba agütsütsü akok.

Tokyo Olympics atema Maana Patel qualify süogo



New Delhi, Chiteni/July 02, 2021 (Agencies):

Hokolbarnü, linük nungi Tokyo Olympics 2021 nung shilem agitsü temsüa akümer India tsür swimmer rongnung Maana Patel mezüng kümogo. Kasa mapang, iba Games nung shilem agitsüpur India swimmer rongnung la tasembuba alitsü.

Patel ya Ahmedabad nungi backstroke swimmer ka lir aser iba asayamung atema Srihari Nataraj aser Sajan Prakash na den la temsüa kümogo. Olympics atema Patel qualify asüba osang ya Sports Minister Kiren Rijju ajanga jangjatsü.

"#Tokyo2020 atema qualify asür India tsür swimmer rongnung Backstroke swimmer Maana Patel mezüng aser India nunger rongnung swimmer tasembuba kümogo. Universality Quota ajanga la qualify süogo aser iba jenjang ajangzüktteta atema la nem tenüngsang agütsür," ta Twitter

ajanga Rijju-i lemsatep. Arishi küm 21 tain Patel ya athlete takotet ka lir. Lai 50 backstroke nung gold medal takok nguogo. National Games - 200 metre backstroke nung Patel-i gold medal takok ngua lir. Iba dak alaka, 60buba National School Games (2015) asayamung nunga, 'backstroke' nung national record yanglua 100 metre backstroke tetoktepa nung lai gold medal takok angu.

2015 küm, Olympic Gold Quest atema Patel shima liasü, koba India swimmer rongnung iba asayamung nung la mezüng aniok. Küm asem sülen, 2018 küm 72buba Senior National Aquatic Championships asayamung nung Patel-i gold medal asem tashi takok angu. Thiruvananthapuram kübok ayongba Senior Nationals nung, Patel-i backstroke tetoktepa asempronlga koka iba jenjang ajangzükttet.

Toni Kroos football asaya nungi anener

New Delhi, Chiteni/July 02, 2021 (Agencies): Germany nunger Toni Kroos-i international football asaya nungi anenba osang Hokolbarnü sangoktsüogo. Euro 2020 sülen, football asaya nungi anentsü sentong renem aser 2022 World Cup nung masayatetsü ta ni meteta liasü, ta Kroos-i ashi.

"Germany atema ni 106 ben

asayaogo. Joko football masayatsü asoshi iba asaya wadang nungi anentsü," ta Twitter ajanga Real Madrid midfielder Kroos-i lemsatep.

Mongolbarnü, Euro 2020 - 'Round of 16' nung goal 0-2 agi England makokba sülen, Germany pur iba asayamung nungi tsükogo.

"Iba asayamung (Euro 2020)

temer sülen football asaya nungi anentsü ni telemtetba agiogo. Qatar nung World Cup 2022 asayamung nunga ni shilem magitetsü ta kü mulung nung teti jembia aru," ta Kroos-i shisem.

2014 FIFA World Cup final nung Germany-i goal 1-0 agi Argentina akokba mapang, Germany national team nung Kroos dena liasü.

COVID-19 Nagaland: Nisung 25,382 nungi... (Tapak 1 nungi...)

Nagaland nung COVID-19 alitsü akok ta temolung melemi bilemba sample 2,28,893 tendangogo. RT-PCR ajanga 98,139, TrueNat ajanga 62,102 aser Rapid Antigen Test ajanga 68,742 tendang, ta Dr Kikon-isa ashi.

"Brihostibar tashi nung nisung

4,53,092 nem COVID-19 vaccine indang dose 5,17,598 agütsüogo," ta State Immunization Officer, Dr Ritu Thurr-ia ashi.

Vaccine agirtemji frontline workers 60,174, healthcare workers 15,811, arishi küm 45 ser temapur 1,53,038 aser arishi küm 18 nungi 44 tsüngda alir

2,24,069 lir, ta paisa ashi.

"Vaccine agirtem rongnungi nisung 64,506-i dose anaprong agiogo. Parnokji frontline workers 29,142, healthcare workers 10,595, arishi küm 45 ser temapur 24,752 aser arishi küm 18 nungi 44 tsüngda alir 17 lir" ta Dr Thurr-isa metetdaksü.

DoSE-i sorkar school tem nem... (Tapak 1 nungi...)

Ano, July 9, 2021 matongdang school tekolakpurtemi pei pei DEO/Sr. SDEO/SDEO nem class shia admission magiba kaketshirtem tenüngtem agütsütsü. Iba indang osangtemji bendener July 13, 2021 tashi nung Google Drive ajanga agütsütsüla.

School tekolakpurtemi Tesayurtem/NGOs/Kaketshir teloktem/Arogo lennirtem den yaritepa admission magiba kaketshir tsürabur/Guardian den tongteptsüla aser parnok dang kaketshirtem maneni

züngdaksütsü ajungmesotsüla, ta Principal Director-isa ashi.

Academic Calendar 2021 atema Class VII tashi admission agitsü atema anogo August 8, 2021 tashi atsülangtsür. Class VIII aser temapur admission atema NBSE-i lateta aliba anogo agitsü, ta paisa metetdaksü.

Special Admission Drive nung class shia admission agiba kaketshirtem indang tenüng August 14-18, 2021 tashi Directorate of School Education nem agütsütsüla, ta paisa ashi.

School aser Department ajanga Online/Offline Teaching-Learning maparen inyakba nung school tekolakpurtem aser tesayurtemi kaketshirtem akokba tashi yaritsüla aser Online/Offline mode mapa küma inyaktsüla, ta Shanavas-isa metetdaksü.

Maneni, DEO/ Sr. SDEO/ SDEO temi parnok den mapa lemezüka aliba JEO/AEO/SIS nem Inspection duties lemezüka mapang shia school tem semdangdaksütsüla, ta Principal Director-isa ashi.

NMA-i Nagaland sorkar dang AFSPA... (Tapak 1 nungi...)

"Testüba kümtem iba tashiyim ozüng ajanga Naga nunger nem timtem bentsür aruba aser tekangshi ajurubatem India sorkari mebilettsür. Army-i tashiyim mapa inyakba ajanga tetsür aser tanurtem densema nisungtemi timtem balala ajuruogo. Mitkar tashi amshiba aser taila khatepba ajanga tapayutsü taküm aika samaogo" ta NMA-isa ashi.

"Nübertemi shimtetba lennirtem ama iba Act kübok asenoki timtema aruba putiotsü asoshi bilemtsi imlar. Nagaland nütsüng yongsük nung tetsür tesadang ka jungnüa lir anungji AFSPA ya matsülangi agientsüla" ta parnokisa metetdaksü.

"Nagaland nung AFSPA maneni atsülangba ajanga temolung melemtep talila adoker aser State police force tashimait kümdaksü.

Tashiyim agi senotsü meshiba aser tanga ozüng alema mapatem State police kübok lir ta AFSPA ajanga ashir anungji iba Act ya joko matsülangtsüla" ta NMA-isa Chief Minister dang ashi.

"Naga putiotsü atema kanga dang tongtipang mapang ka nung chichiba yimjung bener arutsü atema Tsüngremi nü nem shisatsü agüjang ta onoki sarasadem" ta NMA-isa metetdaksü.

MLA & Advisor Toshi... (Tapak 2 nungi...)

Sentong aika nung WC lenirtemi pa den Naga nunger nükla lemsatsü maongka ajuruogo, ta ashi.

Pa ya nükla tajung aketba lenir ka liasü, shiba tantsü-tambu temi senmanger tajung ka ama züngshia liasü. Lanurtemi pa dak ranglok aser sakloka liasü. Pa ya tasü tait civil society lenirtem asoshi milen abener ka liasü, ta WC, NNPGs ajanga ashi.

Ajungbena Toshi Wungtung, MLA & Advisor IPR, SCERT & Village Guards, Nagaland asüba osang angashia Naga Hoho aoksar aser jashir, ta Naga Hoho tir, H.K. Zhimomi-i sangdong ka nung ashi.

Asür Toshi Wungtung ya ajemaliba aser bendanga agütsüba lenir ka liasü, shiba Naga nunger atem shilem tulu Naga nüburtem tenzükogo. Pa ya Naga Students' Federation

(MSF) nunga Advisory Committee züngsem ka ama inyak aser Forum for Naga Reconciliation (FNR) nunga züngsem ka ama inyaka liasü. Pai Naga nunger lungjemtsü asoshi bendanga agütsür inyakba aser shilem agiba atema teti bilemtetsü, ta Naga Hoho sangdong ajanga ashi.

Asür Toshi Wungtung kinunger aser tembartem den asükhu lemsateper, shiba New Delhi nung July 1 nü asü, ta Medo Yhokha, Advisor, Technical Education and Elections, Government of Nagaland ajanga sangdong ka nung ashi.

Pa ya takotet lenir ka liasü, shiba tishitsü tajung agi nübur ani, teshisadanger tajung aser tzü-mopung wazüka ayur tejangja nübu ka liasü. Pai teti lokti ajungtsü atema bilema liasü, ta Advisor Medo Yhokha-isa ashi.

BILEMDANGANG

"Nübu aser rongsen indokba ama tajangzük angutsüla."